

Grondas midadas tar La Posta

Jürg Bucher, il CEO da La Posta, va en pensiun

DA LUCAS DEPLAZES / ANR

■ Per la fin d'avust 2012 va il schef operativ da La Posta, Jürg Bucher, en pensiun. Susanne Ruoff surpiglia uss il timun da La Posta. La nova lescha per La Posta che entra en vigur il prim d'october 2012 porta diversas midadas. Suenter 30 onns en servetsch tar La Posta va Jürg Bucher cun 65 onns en pensiun. El ha appartegnì diesch onns a la direenziun dal concern, ils ultims trais onns sco schef operativ. Sco conresponsabel per las strategias da La Posta ha Bucher influenzà il svilup da l'interpresa dapi la separaziun da la PTT l'onn 1997. Il svilup dals ultims 15 onns è stà caracterisà d'ina gronda dinamica cun bleras midadas. La Posta ha reduci' ils uffizis da posta, introduci' il servetsch da chasa, cumbinà posta e stizun en il vitg ed augmentà la puschida sin il sector da finanzas. Tar tut las midadas da structura ha ella mantegnì la qualitad dals servetschs sin in aut nivel e respectà ils aspets socials tar la reducziun da persunal. Pli u main ha ella – grazia a Postfinance – pudì mantegnair il dumber da plazzas sin var 45 000. Ella po quintar vinavant cun ina gonda confidenza tar il public e tutga tar ils gronds mitos svizzes.

In servetsch public d'alta qualitad

Ils ultims 15 onns haja La Posta fatg atras in svilup dinamic, ha punctuà Jürg Bucher en sia ultima conferenza



Jürg Bucher: La Posta è bain preparada per l'avegnir.

FOTO L. DEPLAZES

da medias a Berna. La chasa saja bain preparada per il futur. La Posta ha raziunalisà ils divers servetschs, reduci' ils custs e realisà ils davos onns remartgabels gudgons. Ella ha pudì mantegnair la qualitad dals divers servetschs sin in aut nivel ed augmentà l'effizienz.

Bucher ha profità da la preschientscha da las medias e preschentà la bilantscha da La Posta per l'emprim mez onn 2012. Il gudogn da 459 milliuns francs muntia ina reducziun da 17% en cumparegliazun cun l'onn passà. Ils motivs persuerter sajan ils tschains da chapital fitg bass, la reducziun dal traffic da brevs per 1,8% ed in augment dals custs da persunal. Per quest onn quinta La Posta cun in gudogn da 800 milliuns francs.

La Posta na vegn betg privatisada

La mesemna passada ha il cussegl federal mess en vigur la nova lescha e l'ordinaziun davart La Posta sin il prim d'october 2012. Davent da l'onn proxim vegnan ils divers servetschs da posta dirigids d'ina holding, numnada «Post CH AG» che cumpiglia il traffic da brevs e pachets, ils uffizis da posta ed ils divers servetschs da management. President dal cussegl d'administraziun da «Post CH AG» resta Peter Hasler. «PostAuto AG» è responsabel per il transport da persunas, resta dentant sutamess a Post CH AG. «Postfinance AG» survegn da nov in agen cussegl

d'administraziun e daplì autonomia. Postfinance vegn er sutamess a la surveglianza dal martgà da finanzas (Finma). Il parlament n'ha betg lubì a Postfinance ina licenza da banca, aschia ch'ella na po betg conceder credits ni ipotecas. Vul ella far quai, sto ella vinavant tschertgar ina collavuraziun cun bancas che disponan d'ina licenza. Dentant era en ses nov vestgì resta La Posta vinavant ina interpresa da la confederaziun.

In imprendissadi tar La Posta

Per l'onn 2013 offrescha La Posta 750 plazzas d'imprendissadi en ils secturs informatica, logistica, commerzi e mantegniment.

La scolaziun vegn absolvida en rotaziun, quai vul dir ina occupaziun en plirs secturs. Ils giuvenils emprendan la demananza en contact cun ils clients, cun ils superiurs e la collavuraziun en in team. Ils giuvenils emprendists pon er far in stage en ina outra regiun linguistica. Tgi che giaviescha, po cuntinuar la lavur tar La Posta er suenter l'emprendissadi. Ulteriuras infurmaziuns datti sut: www.post.ch/Lehrstellen.